



La Pola Siero, a 5 de febreru de 2018.

L'abaxo firmante D. Edgar Cosío García, con DNI 52.618.966-A y domiciliu a efeutos de notificaciones en Plaza del Ayuntamiento s/n de La Pola Siero, en calidá de voceru del Grupu del Conceyu d'Izquierda Unida – Izquierda Xunida (IU-IX) en Siero y al amparu de lo dispuesto nel artículu 97 del Reglamentu d'Organización, Funcionamientu y Réxime Xurídicu de les Entidaes Llocales plantea la iniciativa que vien darréu pal so estudiu y dictamen na comisión informativa correspondiente y aprobación postrera si cabe pol Plenu del Conceyu, y por tantu ESPÓN QUE

La llingua y cultura asturianaes tuvieron nes últimes décadas un desendolcu innegable dende'l puntu de vista de la so codificación y normativización, del puxu a la so lliteratura y de los llogros na escolarización nel ámbitu de la educación. Al empar, les actitúes y les demandes sociales no que cinca a la so normalización algamaron posiciones perclaramente mui mayoritarias ente la ciudadanía asturiana.

Llamentablemente, estos pasos alantre nun se vieron acompañaos del desarrollu de les midíes xurídiques que recueye la Constitución Española pa les respetives llingues autonómiques y qu'en tolos casos sacante'l d'Asturies supunxeron el reconocimientu del estatus llegal d'oficialidá. Nesti sen, la Llei d'Usu y Promoción del Asturianu fixo rescampar, tres venti años de vixencia, que nun ye bastante pa facer vidable la sobrevivencia de la llingua: nun aidó a la xeneralización de la enseñanza en toles etapes, nin a garantizar los drechos profesionales del profesoraú, nin a la promoción efeutiva del so usu n'espacios formales de comunicación, nin a la so normalización nos medios públicos...

Nestes circunstancies, una llingua minoritaria y minorizada como l'asturianu, nun va a tener futuru como llingua de cultura d'Asturies. La reivindicación de la oficialidá foi y sigue siendo la esixencia permanente d'una parte perimportante de la sociedá y delles instituciones asturianaes (como la Universidá d'Uviéu) dende la transición política. Nun hai qu'escaecer tampoco'l sofitu dende va años de munchos conceyos asturianos al traviés de declaraciones d'oficialidá nos sos territorios, l'aprobación de declaraciones similares a esta polo menos en siete conceyos dende la seronda pasada fasta anguaño nin el nuevu escenariu políticu abiertu a nivel rexonal dempués de la reflexón fecha nos últimos meses en dalgún partíu que fasta agora nun yera favorable a la oficialidá.

Y por too ello, el Grupu del Conceyu d'Izquierda Unida – Izquierda Xunida (IU-IX) propón-y al Plenu del Conceyu de Siero los siguientes ALCUERDOS

1.- Considerar que ye'l momentu d'avanzar na oficialidá del asturianu como elementu fundamental pa la so dignificación normativa y la so normalización social.

2.- Nesti sen, y col fin de llograr esti oxetivu, instar al Gobiernu d'Asturies y a les distintes fuercies polítiques con representación parllamentaria a entamar un procesu de diálogu y consensu p'aniciar los trabayos d'una reforma del Estatutu d'Autonomía d'Asturies qu'incluya nel mesmu la oficialidá de la llingua asturiana.